



錦溪集
坤

~ 16
2359
2



2359
2-2



錦溪集卷之四



疏 催歸原情

上

神宗皇帝

伏以 臣 名教中一罪人也既未仗節死義於龍蛇
 之難苟為戴天圖命於豺虎之窟今到中華復見
 天日自幸自訟誠惶誠恐且以 臣 區區所抱敢此
 冒瀆伏乞 聖明哀矜而垂察焉辛卯春賊酋秀
 吉敢以射天之計肆出假道之說遣使誘我此果
 人臣所不忍言所不忍聞者小邦抗斥其使奏聞

天朝越壬辰四月賊魁行長等率精兵二十餘萬
艘來陷汾海地而五月直擣京城 國王廷馬蒼
黃移次西郵賊乃乘此空虛夷我 先王二墓火
我 先王五廟跳梁八路屠戮萬姓其為國讎決
不戴天臣之七十雙親全家二十餘骨肉俱在奔
竄必陷賊鋒其為私痛亦已罔極所遭如是誠不
可一日容息於覆載之間尚爾苟活到此者只欲
報 君父之至願也况彼狼心不悛虺毒益肆則
此非獨小邦之患而實為憂於 聖明七八載東
顧之餘矣臣之日夜血泣汲汲於歸者第以所探

賊情細陳 本朝亟修豫備雪復之策而上以洗
廟社之恥繼收雙親白骨於雨雪草莽之中而下
以舒泉壤之憾則臣雖死之日猶生之年以此所
懷日望鄉國心肝墜裂憂伏乞 聖明另察外臣
狐邱之忱特降 天朝鴻澤之施情溢辭感言不
知裁無任祈懇激切屏營之至

文

呈大司馬 金學曾 軍門

伏以認徧邦末品絕域俘蹤既未早決於熊魚之
界忍為苟活於豺虎之窟如究其罪罪不可名焉

然而 廟社烟塵國恥極矣邱墟草莽私痛切矣
第以應變雪復之志蓄積于中而強渡中華尚稽
東還淚繼以血哽塞難言伏願 都爺另加矜察
焉恭惟小邦雖僻在東隅粵自箕聖并制八政愈
久愈明賢君良臣無代無之衣冠文物燦然備具
禮樂聲教猗歟可徵是以大邦之待獨居諸侯之
上而濫得小華之稱者久矣不然頃日島夷之亂
聖天子何必徵兵天下命將閩外討平醜賊至此
其赫然乎幸賴 天威今雖小安固不可永謂之
廓清惟彼狼心不悛他毒必肆前頭之患恐有甚

於變生之初認以沼吳之策先叫 天闈繼陳
本朝而欲爲豫備應變則歸心如矢一日三秋憂
伏乞 都爺以認憫迫之情上達 皇朝特賜迴
送之地謹昧死以聞

再呈大司馬門

伏以情旣訢矣辭已竭矣冒煩狂叫罪添無狀然
認之無狀不在於狂叫而在於蠢蠢冥頑少無人
臣人子之誠不足以 激感都台監仁慈明聽之
下終不得早歸者也陽氣發處金石亦透至誠所
激天地卽感認如有念 君親忠孝之誠 都台

監豈不能感應而矜察也但轅門嚴肅如隔天上
草芥俘賤因何控訴雖以 都台監好察之明勢
所難燭而未易回送者理之常也大抵認日夜哀
泣者恐未及歸於霜雪之前尋見亡親白骨於草
莽之間也朝鮮地勢山岳高峻自十月雪高三尺
而正月始開若雪下之後則雖到故鄉豈能覓父
母被害之處乎若未收拾又使冤魂慘慘於來冬
兩雪之寒則人子情理寧欲萬死哀念及此不覺
哽塞氣絕萬祝 僉相國幸勿厭薄更加垂憐早
議回送也自三月留滯歸心如矢日夜倍熾百病

交侵殘命垂盡一死無惜而抑恐有不得聞 君
親之消息更此縷縷伏乞大君子惕然哀之也

謝呈布政司

徐匡岳見登李

羅村門人 衙門

伏以認強顏天日雖保頑命自顧多慙生不如死
特蒙相國至恩 賜以天下至重至寶之金與書
是實相國過優於泛愛之德不擇貴賤賢愚而厚
薄之故也榮光倍增恩澤非常不勝感激金囊而
書閱則皆是相國窮源洙泗討論義理發明乎前
古未發明至精至密之蘊與孔夫子相傳止修之
學復明乎此雖百朋之錫豈足以當此一秩書哉

潛思所賜之至意必是相國側念弊邦兵燹之餘
聖經賢傳俱被灰燼恐吾道之湮晦因使認抱歸
而究繹得有誦法之樂又布諸國中俾覺後覺也
倘非相國以達德大道宗匠斯文任重致遠而兼
濟天下之誠其何能至此哉然則思認於一時之
德輕而小開來學於萬世之功重而大認不須屑
屑以私意容謝也第念認誠鄙夫恐未酬相國所
賜之盛意無任愧悚謹此以謝

再呈徐布政

伏以認以遼海一俘人曾忝科進職秩惟卑六載

矢石之場未能掃醜而仗節萬里鯨鯢之濤僅得
涉艱而保命以君親一念不忍浪死於異域幸
托愷悌君子林震虢得到父母禮義之邦而伏承
相國篤愛之恩薦八明道堂猥與諸君子多月參
講此大相國憐恤之眷實不下於古聖人吐握
之風令人感泣認之久滯院中思念故國即人情
之自然而都爺其肯款議僉相國得如是護
送故國耶鴻毛之命萬死何惜而一時漸滅有同
溝瀆之自經故萬死隱忍一息尚存日夜揣摩者
歸謁吾君生聚教訓大舉沼吳上雪山陵廟社

之恥下洗全家殄滅之痛夫然後生隕死結受酬
老爺罔極之恩只此仰謝

啓

上監察御史

吳志在徐
宗師門人

伏以羈鶴辭籠尋舊巢於仙境幽鶯遷木望新音
於上林在涸窟鱗念常切於清水將死老兔首必
向於故邱尚爾物然矧伊人矣伏惟憲臺松筠勁
節雪月精神英飛鳳穴澡五色而凝華穎躍龍門
涵九重而毓潤早折仙桂浥廣漢之清香少佩承
明沐銀臺之雨露加以工深道學窺孔孟之門墻

志切經綸撫伊周之規範討雍容之正論振紀綱
於廟堂獻慷慨之嘉猷盡衷曲於宣室名重民望
忠簡帝心奉命江南加額漢北擁花驄之轡既有
志於澄清正繡衣之襟苑紆策於經濟嚴霜秋降
叶隼擊而防小人零露春濡節羔裘而禮君子仁
必載勇孰不稱鐵面之堂堂智則斯明誰不畏豸
冠之岌岌竊念認偏邦賤品亂代俘臣智異懷蛟
無奇策之可取才非夢鳥乏小藝之足觀五載矢
石之場猶舉義而忘死三年豺虎之窟未仗節而
偷生共戴一天愧秀實之擊賊並立同壤恥杲卿

之罵胡念二聖之中興望蘇卿之歸漢戀雙親之
存歿擬包胥之哭秦苦守丹心敢保頑命幸渡東
海遂入中華再瞻舜日之明感淚自下更覺堯天
之大微忱益堅至於恤之以恩敬禮義之厚俗愛
之以德歎文獻之遺風絃誦家家揔有識王化之
士鼓舞處處皆不知帝力之民太平春風羈愁自
然霧豁康衢烟月旅恨庶可雲開但一隔封疆萬
里山水遲留數月倏忽三春望雲太行狄公之思
倍切倚斗夔府杜子之誠愈深所冀顧眄賜顏曲
照微悃轉送隻影使拂孤鞭歷望 天朝泣叫帝

闕生還故國朝謁吾 王然則捐軀不辭效誠魏
草碎首非苦投報楊金再觸嚴威不堪惶悚

謝徐宗師遣醫治疾

伏以命醫賜藥俾治賤疾連日服飲諸况少蘇銘
感入骨不知攸謝凡人之病或少失眠食之溫冷
或暫有思慮之沉憂亦不免添越支離呻吟况認
以慘惻孤哀萬里鯨波三年虎口百死一生血泣
催歸者乎漸毀骨立榮衛已削百病交侵理之常
也然少有着實涵養透徹義理自得於素行患難
之地而從容乎顛沛流離之際者心疾之極元氣

之敗其何以至此哉認非不知此病之根只緣性
度率直縱情任意哀痛摧傷少無節制方寸之亂
愈久益深積傷之懷隨日沉綿然則雖峻劑神方
莫如早鞭歸騎以治方寸之病伏祝相國仁恕焉
自蒙顧憐之後瞻望臯比景仰山斗懷有所托心
神稍定此豈非相國篤學愛士之德蕩蕩然可軼
於吐握之聖者乎認之苦滯反有從學之幸欣欣
然如有所得榮感之極言不知裁敢此趨謝以祈
體諒

催歸原情疏後

神宗皇帝詔曰爾忠如祥爾節如武苦渡鯨波欲叫
天闔其命貴得緊貴得緊以下缺七月軍門都爺護

送北京

萬曆壬辰先生倡義丁酉被俘入日本已
友遇天使林震號到福建上達催歸疏

故有是
詔

神宗皇帝遣還 詔曰魯認之命貴得緊貴得緊命

下兵部 賜馬一疋 命差官史汝梅護送所率

奇孝淳等三名渡鴨綠江同年秋先生承詔至
皇城陛辭時有是詔

東還本朝後

宣祖大王親自引見堂上 下教曰別提魯認自日
本至中華而生還得全素節皎然本心

天監所燭

庚子春先生始還本國上達復讎策故有是教

左遷羣山後

宣祖大王下教曰魯認持身清勤每欲復讎抗陳奇

策古有社稷臣今爾近之陞資 通政 除水原

府使

乙巳冬先生上召吳策故有是教

錦溪集卷之五

附錄

行狀

先生姓魯諱認字公識號錦溪鼻祖諱啓有商扶
風人博習詩書禮樂從箕聖渡遼敷八條創并制
受封江華連三世掌教後世諱忠國與卞盧閔洪
李呂董七人八仕于唐還仕新羅爲八學士傳至
侍中公諱穆即先生之十五世祖也仕麗朝封咸
豐君十四世祖諱夢弼殿中內給事十三世祖諱
仁厚文壯元銀青光祿大夫登中朝制科禮部員

外郎 賜紫金魚袋判禮部尚書左僕射十二世
祖諱寬道修文殿太學士門下侍郎平章事諡文
安十一世祖諱彰文典客令密直司使十世祖諱
汝姬寶文閣直提學 贈同樞密院副使九世祖
諱慎初諱哲在麗末癸卯以正尹從我

太祖 時為麗判宗簿寺事 收復京城錄一等勳以上護軍與安
遇慶等平紅賊錄一等勳

太祖朝贈諡武烈八世祖諱成顏禮曹正郎行縣監
七世祖諱世顯進士六世祖諱儒司宰監正五世
祖諱希周大護軍 贈判書高祖諱昇生員曾祖

諱自貞進士祖諱行權叅奉行縣監考諱師曾

贈叅議妣淑夫人全州李氏生公於 嘉靖丙寅

氣宇倜儻性行純孝重厚有山岳之像沉深有河
海之量凡於性理之學格致之功無不通解少學

于羅叅奉恆又從李月沙 廷龜 金南塘 光運 遊焉

萬曆壬午中進士文章行義為世所推乙酉薦 除

別提當壬辰難從權光州 慄 仗義討賊屢戰收勳

丁酉被俘入倭抗節罵賊七日不食而凜凜有生
氣諸倭見而異之終不敢加刃以魚饌蔬食朝夕

供饋先生以未知 君親何如不食魚饌而只進

疏菜已亥春適遇 天朝間諜使林震號決謀同
舟得到閩中以徐宗師匡嶽薦入兩賢祠書院與
諸生講論經學唱酬詩韻院中師友莫不稱賞皆
曰海東夫子是年夏上催歸原情疏

神宗皇帝下祥忠武節之詔命軍門都爺護送本國
庚子春乘 天賜馬到漢陽

宣祖大王特賜召對極加褒美 命駟還鄉父母幸
免兇鋒壽終於戊戌正月矣先生廬墓追服服闋
後登勸武科 除宣傳甲辰六月從李統相慶瀾
擊破餘倭於唐浦有勝戰圖丙午 除水原府使

丁未 除黃海水使有去思碑未幾陷於仁弘所
詆左遷于羣山當光海朝謝病而歸逍遙自遣

天啓壬戌五月四日病卒于家享年五十七淑夫人
濟州梁氏絜奉琛女墓羅州离婁谷面雉足村案
山艮坐之原雙封後孫啓運封疏叫 闡春曹廷
稟館儒發通

正廟己酉建祠于羅州居平面東衛村杖屨之所噫
先生之貞忠大節炳乎日月振於華夷者此誠
列聖朝休養之功而亦豈非武烈古家之風耶信乎
于孫貽謨于祖有光也已先生文集家君釐正故

余盟水起敬略敘如右云爾

屠維大荒落陽月上澣 延安李教源謹撰

有明朝鮮國錦溪魯公墓碣銘

並序

在昔 長陵龍蛇之役有一奇男子為賊所俘間
關顛沛萬死一生而孤忠大節聞於天下後世者
錦溪魯公其人也於乎壯哉公天性剛果氣宇侗
儻少學于羅叅奉恆先問程朱之學羅公亟稱之
又從金南塘光運林石村惰遊文章學業為世所
推年十七中 萬曆壬午進士乙酉除別提當壬
辰亂權元帥慄素知公膽略貽書招之公承父命

赴陣幸州宜寧之戰屢立奇功丁酉公適歸家賊
欲害公雙親公翼蔽乞全賊感其誠捨之而去聞
天將楊元被圍於南原輕騎往覘道遇賊單槍奮
擊會大霧四塞為流矢所中頓絕方甦賊因之束
縛以八日本欲自裁亦不可得抗聲奮罵七日不
食猶凜凜有生氣賊異之不敢害翌年與同俘輩
乘小艇夜逃旋被執賊露刃恟降公少不變色但
曰速殺我速殺我賊亦知其終不可屈而止公潛
懷沼吳之志詳探賊情虛實山川險夷時有 天
朝間諜使林震號至決謀同舟得到閩中徐宗師

匡嶽一見而奇之薦八武夷書院與諸生講論小學家禮心經諸生成曰先生海東夫子因軍門上催歸原情有云欲陳賊情於本朝修復雪之策上以洗廟社之恥繼以收雙親白骨於雨雪草莽之中言甚激烈皇帝詔曰爾忠如祥爾節如武苦渡鯨波欲叫天闔其命貴得緊貴得緊使軍門都爺護送北京公途過魯昌平鄉拜孔聖廟庚子春至京師皇帝又下詔稱之命兵部賜馬一匹使員外郎史汝梅護送渡鴨綠江既還國宣祖大王特賜召對下教曰爾自日本至中華而

生還得全素節皎然本心天監所燭給駟還鄉公父母皆已沒於戊戌至是始聞之哀不欲生追服廬墓壬寅服闋除冰庫別提以將薦登勸武科除宣傳官又除所江節制甲辰從李統使慶濬擊破餘倭於唐浦有勝戰圖丙子上教曰魯認持身清勤每欲復讎抗陳奇策古有社稷之臣今爾近之陞資通政除水原府使丁未除黃海水使有去思碑時仁弘張甚欲奪公天賜馬公不許仁弘銜之枳塞甚力以致左遷羣山公見光海政亂知時事無可為謝病歸終老于羅州

錦里 天啓壬戌五月四日卒距其生 嘉靖丙寅壽五十七葬于本州高屢谷面雉足村案山良坐之原後多士建祠東衙村與公先祖武烈公同享公諱認字公識錦溪自號也鼻祖 啓有商扶風人從箕子東來受封江華連三世掌教至諱忠國八仕唐還歸新羅至諱穆高麗侍中封成豐君仍以爲籍至諱慎上護軍佐我 太祖再錄一等勳是爲武烈公公九世祖也曾祖諱自貞進士祖諱行權縣監考諱師曾 贈吏曹叅議妣淑夫人全州李氏配淑夫人濟州梁氏叅奉琛之女墓附

雙封公忠孝根天在倭時饋以魚不食曰不知君親存歿何忍食此旣渡海猶不進珍饈華人義之曰朝鮮素稱文獻果然矣別進蔬果製白衣冠而與之公常以不終養爲至恨築錦溪亭于墓下爲畢命松楸之計每遇夫日服素過哀躬執烹飪不委婢使曰人子於終身之喪不敢不自盡公與睡隱姜公沆同時被俘及歸以復雪策致書睡隱其答有南越王頭必懸漢北闕下西平公業再出吾東方人之語其期待綦重可知也公之在閩徐宗師贈白金及明宗錄院中諸賢各以歌詩送

別名之曰 皇明遺韻公詩文警絕為華人所稱
賞有集一卷刊行于世噫公早罹漆齒之難幾死
殊域晚遭奸臣之詆罔展素蘊何其不幸也然呈
身上都既被 皇祖之廢生還故國荐蒙 聖主
之嘉且公不過偏邦一士耳乃能躡孔朱之遺墟
盡天下之壯觀與中國士大夫講聖賢之書使人
益信我東之為小中華又何其幸也幸不幸蓋有
數存焉而公之英靈亦應幸其幸不以不幸為恨
於土中也公後孫聲鐸改名鐸獎鐸等來乞牲石之
文氣義激昂託名為榮不辭而為之銘銘曰

祥忠武節 皇帝若曰古社稷臣大哉 王言
撮以為銘炳炳萬齡過此墓者疇不式也

崇禎五乙亥四月日嘉善大夫司憲府大司憲兼
世子侍講院贊善成均館祭酒 經筵官書筵官

西河任憲晦號希陽 齋門人 潭州撰田憲書 碣

啓

萬里封侯已投班定遠筆九重獻策又乘宗太尉
風非小丈夫所為乃奇男子之事庶見上雪申包
之恥重酬子胥之讎南越王頭必懸漢北闕下西
平公業再出吾東方人狼星恆拱斗魁鯨波永清

鯨海即今陽島熇熇飛翫點點樓船將軍下瀨無

恙豫州刺史擊楫如何

公在龔津任時以雪復之策遺姜姜以塔答之

萬曆丁未孟秋上幹前佐郎姜沆

睡隱

謹啓

辭

魯君公識困而在下無所知名歲丁酉被俘倭窟
脫身而浮于海泊于浙江作字道姓名縣人聞于
布政司傳食詣京師時徐斯文匡嶽見登倡明道
學于浙于閩于廣之間從而師者咸萃于武夷朱
晦菴書院講習其業徐見公識所為文哀其言而
壯其志遂廩養之乃齒諸學者徒公識與其徒論

辨小學家禮無不詳曉其義意既又說盡吾東方
自檀君以來歷代事蹟政教風俗甚博學者歎曰
先生海東夫子暨其東也相與贐以言序其事而
張之吁亦侈矣噫公識居其鄉則不合而訕去其
鄉則能合而伸此豈非命也歟今返其鄉土得一
官而顛頓狼狽又甚矣乃觀於以俘見也顧何如
哉余於是乎不能無感於不合而訕者贈以辭而
伸其意辭曰志固有隔千里而相會得於天者同
此心惟如好惡之不背乃可以發於情而莫之禁
是惟倡之而無和君故貿貿乎半世其奚為一朝

適異鄉人亦不知其誰聞一言而若驚與討論皇
王學者信吾道之東矣服雄辯之森森若鋒鋌豈
邇遐之有間諒知遇之不常惟抱關之非時子又
胡爲遑遑余擊節而沉吟撫世道而悲傷苟非吾
之所欲軒冕不足爲榮光繫太牢之前陳非鷄鶩
之攸享

萬曆丙午仲春禮曹察判

趙希逸

竹陰辭

記

壬辰之亂魯公認被虜入日本久不得返遇中原
浙江人林公震虢因與相熟其人愍公心事壯公

節謀脫還百計遂自日本逃至福建省魯公頗能
文善筆處處聞朝鮮士子從日本逃來待之甚勤
引與遊觀諸處逶迤入武夷山第五曲有朱子書
院院中學徒數百餘院長每日率諸生講學行禮
學規甚嚴晨起擊鼓諸生分庭相揖歌關雎三章
登堂聽講日晚乃罷夕又相揖歌鹿鳴三章日以
爲業令公同參講席幾數月臨別諸生各爲歌詩
以贈之且云朝鮮以爲中原尚陸子山象實不然陸
學間有尚者如此處專崇朱晦菴之學須以兩見
歸語朝鮮云其他廬山瀑布金山寺西湖林逋所

居無不縱觀過魯拜周孔聖廟入北京發還亦可
謂極天下之壯觀焉

萬曆庚子仲春豐山柳成龍

西崖記

湖南魯生袖一帖遊京師遍示士友間蓋其先祖
錦溪公嘗陷於倭寇從間道走中華華士大夫作
詩文以送先生粧成一帖者也夫天之生民豈有
間於華夷之分而朱夫子齒夷狄於人與禽獸間
者以風氣習教移其性也我國雖九夷之種自殷
太師東來文物彬彬爲小中華而逮 聖朝名儒
輩出吾道東矣至我 宣廟朝教化之深普洽洋

溢幾乎家諭人悅之公生于是時以學行薦剡位
不過六品當 國家板蕩之日兵敗陷虜能抗義
不屈脫身虎狼窟窟跡雲海途艱關萬死偶到朱
子故地見禮讓俗聞絃歌聲犁然有契樂留連若
終身焉其尊德樂道之意實不愧賢風遺化誰謂
公一節也况中國人間公之言知我俗一遵朱夫
子禮教而觀其序文贊歎之意蓋出於魯無君子
斯焉取斯之意公之行可謂有光於 邦國而真
不負 聖世培養之教百代之下聞公之風者亦
足以興起矣嗚呼觀此帖亦可見 皇明之於我

金溪集卷之五
國不以荒服待之海外萬里肝膽一家胡越在龍
蛇之亂我東 宗社生靈之命僅如一髮惟我
神宗皇帝傾天下兵竭天下財拯之水火中繼以乳
哺恩凡我東昆虫草木何莫非 皇朝煦濡之澤
哉是以當世中國人士見我人有若平生之舊者
亦體上之意也嗚呼真所謂前王不忘而回瞻今
日中國竟是誰家之天下噫嘻城下之盟皮幣之
奉蓋迫於勢耳若 孝廟之志事此豈可忘歲久
聲湮人心狃安冠蓋橫驚視之以歡樂簪紳衍嬉
恃之以膏雨如忍痛含冤迫不得已八字今不獨

不存諸心又不復形諸言矣茅齋秋生數盃痛飲
起展此帖不覺髮豎冠涕沾臆因誦零丁洋詩更
讀看羊編始知天彝物則不以華夷有間而劫火
焦坑之日猶有不燼之玉也魯生其識之公諱認
字公識歸國官至隋城都護

崇禎紀元後三辛丑季秋上澣東萊鄭存中撰

吾先祖月沙文忠公戊戌辨誣奏文章之盛聞于
華夷錦溪魯公認漂海到杭浙浙中人士皆誦其
文曰此朝鮮李某之文可以知家傳而戶習也晚
秀自學語時聞其事景慕魯公若孔李之世好公

之後孫守國以公周還錄二冊 皇明遺韻一帖
踵門請識其後晚秀竊念士生升平之世安坐飲
啄未嘗見疆域金革之虞者固幸耳若其蟄居一
隅井蛙而埳蟻至老死足不離階庭名不出鄉黨
則於爲人乎何有公於龍蛇之難以藐然一書生
杖劍從權元帥奮厲忠義終贊籌畫躬冒白刃左
右殲賊何其勇也全節於豺虎之叢脫身於鯨鯢
之濤一帆萬里間關瑣尾葆我衣冠返我京國何
其智也歷覽泉漳文明之鄉訪同安之古縣拜考
亭之遺祠與匡嶽宗師鹿院諸儒攝齊升堂講大

學心經之書揖讓討論秩然若滄洲之文席鵝湖
之講會而篤行邃學高譚雄藻使中州諸君子樂
與唱酬咸知東方禮義之邦竟之名徹 天門至
蒙 萬曆皇祖忠如祥節如武之廢我 宣廟古
社稷臣之教煌煌華袞百世不朽遭遇何其盛也
秉樹何其偉也於是乎公之平生本末真可謂忠
孝雙全之天下奇男子其亦不虛生於世也夫詩
云四國有王郇伯勞之歎今之不如昔也以吾東
萬折朝海之誠復見 皇明遺韻於九州陸沉之
日其寶翫而表章奚啻殷彝周鼎之爲二代法物

而已哉晚秀旣感家世舊誼且不勝風泉之思謹
揚扢如右云爾

崇禎四丁丑陽月之望輔國崇祿大夫原任兼吏曹
判書弘文館大提學藝文館大提學知 經筵成
均館事奎章閣檢校提學 世子左賓客李晚秀
述

往者倭難執拘我民人以行魯公認亦爲俘居倭
久確然不少撓潛持舟道中國而卒生還夫去父
母之邦累臣犬羊人情之所大恫也死而已不死
則亦不得不屈也能以義自率不失其守臨事而

斷冒萬死涉重溟而自脫於危公其勇士也哉其
生也非苟其還也非倖也故 天子嘉之中原士
大夫敬之於其歸皆爲詩以致意此可見其義勇
之氣必有能動人者矣且慨然以雪復爲志歸而
上沼吳之策不竟用而死使其策行者其克遂文
范之功也歟惜乎其言不傳無所見其志也今其
孫守國槩其始末並明人送行詩以爲帖庶幾其
蹟之不終泯也云

崇禎紀元後三丙寅嘉平湖南按察使李肇源書
右錦溪魯公周還錄二冊其俘拘漂泊萬死一生

殆書傳所未有猶能熟服經禮激昂忠義全節於
寇讎之域著名於 天子之庭何其躋也然其事
行本末履園太史記識甚詳余不復贅錄中奉載
神宗皇帝褒忠賜還詔一道余竊因是而有感於中
朝鮮處九州之外介瀛海之隅自中國視至藐然
也我

神皇深居高拱治天下四十餘年如天之默運於上
能美利萬物而蒼生卒無以見其跡及倭之入我
疆也悉其賦蛇豕食數千里比至于平壤

天子聞之大興師以救謀臣猛將相望於道八年之
間至天下騷然如薙草盡根後已天下始見雷霆
之奮發而又莫知其倪也其沉幾大慮固非淺中
之士所敢窺度然由後之建虜先移兵擊我始敢
專意犯順竊據天下者觀之我

神皇所以眷眷於我 朝以及於如公之爲難民羈
臣者蓋亦有以也夫錄舊有三冊其一載公東還
後事公性疾惡見忤於仁弘官竟不大振且公
皇城陞辭日有 特詔賜馬事而佚不傳今惟有二
冊余先祖贊成公爲己卯賢良房公彌甥而房公
又魯氏之自出也余故習公之後孫守國得聞公

逸事並牽連書之補其闕文云爾

崇禎四壬午榴夏上澣崇政大夫行原任吏曹判書兼知經筵春秋館判義禁府同知成均館事弘文館提學世子左賓客李相璜謹識

以余觀夫魯錦溪始末殆天下之一人耳萬曆壬辰倭奴犯寇傾覆我邦家公於是時書生杖劍折衝尊俎卻穀之詩書也累然俘囚靡改素操鍾儀之南冠也鯨濤冒險志在雪復陸秀夫之崖海也流離瑣尾講學於考亭之鄉季札之觀樂也葆我衣冠拜手于天子之庭蘇武之生還也自

日本而閩越自閩越而江浙自江浙而上都以至東還水陸萬里歷覽無際又似子長之壯遊也以藐然身而集千古人之衆美豈非所謂天下之一人耶且夫忠文山而節北海邀惠于

大邦之君如彼其盛許以古社稷臣亦粵有

聖祖廢訓宜其東還之日論功上賞待以不次而竟扼於仁弘曾中石畫鬱鬱無所於施此爲忠志之士所慨此爲後世子孫所悲也嗚呼悲夫其後孫守國懼先跡之就泯恐文獻之無徵爰輯其舊藏皇詔二道聖教二則暨閩中陳秋濤儀以下十有

金溪集卷之五
五
五人詩文真跡裝褫爲一冊錦溪所自爲周還錄
並櫝而背負歷謁賢公卿立言之君子乞詩若文
以表章之者有年其志吁亦勤矣往者丁丑守國
以展園太史之命屬余一言久未有復越六年壬
午余乃進守國而言曰卷首之

天詔皇皇王言穆穆有足以不朽公於天下萬世
侍何乎賢公卿立言之君子子可歸休矣

東陽申緯書

今天下爲虜二百年衣冠文物掃地盡矣獨閩越
之士往往講明孔朱之術服習禮教蓋猶有古先

賢之風云况

皇明盛際崇儒重道表章培植之餘哉萬曆間魯
公認沒于倭潛浮海八閩中與其學士大夫周旋
乎庠塾之間辨難乎經禮之文以明我國家治
教作成之美使其敬而進之不敢鄙夷之於其歸
也爲詩序以讚歎推詡爲豪傑士余於是帖知魯
公之賢而又未嘗不慨然有西歸之悲也遂書此
以遺其孫守國若其俾還始末則

天子嘉之曰祥忠武節宣廟獎之以殆古社稷臣
覽是書者庶不待吾言之贅也

正憲大夫議政府右叅贊兼知 經筵春秋館事
同知成均館事延安李始源書

南原士人魯君再麟甫有賢祖錦溪公而為人敦
謹可尚余有世誼而相好久矣今春余適守潭陽
則魯君見訪道其祖錦溪公書院在羅州家鄉而
未刊之文集在院中一為取覽則錦溪公遺事可
按而詳也余於魯君固相好而其祖之所以為賢
則果未得其詳樂聞而遂取來蓋錦溪公以前別
提倡義於

萬曆壬辰之歲而其被俘生還之際始終大節燦然

於 天朝本朝之間者已不可誣耳

神宗皇帝有 詔曰爾忠如祥爾節如武苦渡鯨波

欲叫 天闔我

宣祖大王下 教曰別提魯認自日本至中華皎然
本心 天監所燭每欲復讎抗陳奇策古有社臣
今爾近之煥乎雲漢之昭回炳然日月之爭光儘
乎文在茲矣公何以得此也宜其爵秩之隆赫展
陳其抱負而竟為仁弘輩所沮官止於下大夫之
列無乃命乎可恨也已然千載之下讀是 詔是
教則塵帖之上寵光輝暎畫出伊公當日之心事

金溪集卷之五
矣豈啻若區區軒冕之貴而彼文集之有無又何
與於公哉然而今去公之世二百有餘年矣事蹟
浸微殆湮沒無傳而逝矣天南惟見雲水之白則
亦豈非仁人志士之所可感慨者乎何幸有所集
有足徵者而傳錄間頗漏失謄本又多錯亂不成
編卷之體則又奚足爲可徵之全書乎且孱孫零
替不能以先集藏之家而草草單本只在彼俎豆
荒寂之所則此又魯君之所深歎而缺然者也於
是略正其序次可以首書者可以附錄者推類而
區別之付之能書之吏俾之精謄又模出中華唱

酬若干帖並粧冊而歸之是可以酬我相好之意
而寓我起敬之思也歟錦溪公諱認字公識再麟
其六世孫也余愛魯君敦謹而又有是祖也於其
勤請不能無言忘拙而謹敘大槩如右云爾

崇禎三戊午季夏安東金復鈺謹跋

公諱認字公識初號錦里又號錦溪咸豐人 弘

治 贈資憲大夫禮曹判書諱希周五世孫成均

生員諱昇玄孫進士諱自貞曾孫王考諱行權宣

教郎 順陵叅奉行機張縣監考諱師曾 贈吏

曹叅議妣淑夫人全州李氏公生於 嘉靖丙寅

天性剛果氣宇倜儻少學于羅參奉恆先問程朱之學羅公大奇之又從金南塘光運遊焉斯文日進文章德業爲世所推中萬曆壬午進士與同時名賢李月沙廷龜趙竹陰希逸柳西崖成龍李漢陰德馨南雪箠以恭林石村愾姜睡隱沆羅錦巖德峻丁孤舟運熙相爲道義之交焉二十召入爲別座當壬辰亂與權光州慄倡義討賊屢致奇功救南原陣一朝事誤俘八日本抗節執禮追皇明間諜使林公震號八閩中與武夷書院諸生講論大學止修之道己亥秋承天詔而自吳楚歷

周秦由齊入魯拜闕里孔聖廟庚子春達北京乘天賜馬還到本朝細陳來歷根由及復讎之策宣廟引見極加稱賞仍賜駟還家父母幸免兇鋒而以壽終矣公作廬墓側追服三年壬寅秋服闋除冰庫別提以將薦登武科除宣傳官尋除所江節制使乙巳有羣山之命丙午特除隋城都護旋被仁弘所詆爲甕津節度使準瓜有去思碑天啓壬戌公卒于家享年五十七淑夫人濟州梁氏參奉琛之女也葬于羅州離婁谷面雉足村案山艮坐之原雙封噫公千古一人學行俱備

忠孝兼全考其平生則百世之下猶有凜凜之氣
後之君子聞公之風讀公之書必有流涕而興起
者矣

崇禎紀元後三乙巳季秋叅判全州李亨達謹撰
公嘗作錦溪亭於墓下每遇諱日悲哀涕泣素服
而居躬執炊物不委婢僕曰人子於終身喪不敢
不自盡又以妻飲恨而殞終不再娶西崖柳相常
歎曰魯某才德將大用之器云嗚呼公之大節炳
如日星孝能感賊脫老親於白刃義不顧身飽風
霜於倭窟遍遊歷覽生還父母之邦苟非烈丈夫

能至於此哉惜其遭逢多艱以文武俱備之才竟
止水閫之任百世之下孰不嗟惋也公之經險著
述最多而遺失不收獨有日記數編觀此可知操
履之卓卓惟俟立言之君子以傳不朽之美千萬
幸甚

通訓大夫前縣監金時佑記

往在龍蛇人事嗚呼黑齒猖獗蒼生魚肉三精晦
霧誰知大明於中天四維震盪孰能勁草於疾風
二百年冠帶之俗得免禽獸而左衽者寔賴諸君
子扶綱闡義之力而錦溪魯公即其一也其肇舉

義旗召募鄉隣武穆之坦背狼覃之陷堅也脫身
虜廷扁舟越海荀罃之謀褚雲長之出關也講學
武夷奧蘊畢陳則敦書之卻縠說詩之匡衡固不
足道而直是撫鄒魯之正論溯閩洛之真派也
天子曰嘉八字袞褒 聖祖爰命三錫寵綏煥然遺
芬至今未沫噫士君子端居燕處明目張膽陳說
義理罔不暢快乎聽聞而及夫蒼卒顛沛其能踐
言而成仁者幾希李陵與衛律同罪范質共王溥
下拜以至龍頭之華歆鳳毛之郗鑑終不免爲小
人之歸者蓋其見理不精臨事欠商之致由是而

言公之一節不渝萬死彌堅者足可驗平日學問
之工深造精詣蔚爲我東之真儒而官止水閫之
任竟使後之人莫詳其所蘊是爲可恨乃於郡齋
岑寂之中公之七世孫翼甫袖遺集講舊好而徵
跋于余余嘗於先祖竹陰公遺稿中見爲公著述
者每有高山景行之思矣茲不敢以不文而辭謹
敘顛末如右云爾

通訓大夫行淳昌郡守趙基復謹跋

附

五言律詩

金溪集卷之五
全節仍天下湮名竟海東 帝褒一言重公議百
年空蠻徼凌雲藻鯨濤照日衷從來蘇屬國忠義
後諸功

右蓬山鄭世翼

七言律詩

七年兵甲一身輕萬死艱關跡似萍海上看羊餘
故節遼東歸鶴共殘生蠻天風雨迷孤島 帝里
烟花閱百城到日尺疏論洗恥堂堂忠義尚留聲

右錦城朴宗正

天意分明玉汝成層溟絕徼死中生已看豺虎驚

高節更遣魚龍識大名左海咸推君子國右文同
是聖人氓縱然未試沼吳策歸路恩褒動 帝京

右全城李翊會

涉險蹈危慷慨多幾年南北咏悲歌孝符曾子蠻
援劍忠似蘇卿海不波槎使殊恩銘骨髓 皇明
盛德重山河復讎未遂身先死毅魄千秋痛若何
後生前樂安郡守田光尹謹稿

代武夷書院學徒送魯先生東歸寄語朝鮮學者詩
箕子古國人有一素冠朝帶扶桑紅雕樑鸞辭諫
院樹幽谷鶯遷喬木叢 天門御馬送君歸萬里

鯤岑青不窮倭營幾日泣瑣尾不幸忠臣從海東
三秋燕獄楚臣淚十年天山蘇子忠

以下公已酉
升學吳繼未作

海東夫子賦

已酉升學再抄
大司成尹行元

斯文煌其大統喜不墜於青邱謠關西而伯起出
河南而程氏經筵闢而閭侍子庶幾乎其殆既道
學之如彼寔名言之在茲稱賢聖曰夫子孔孟後
而其誰春已暮於綵花風亦踈於壇杏河驪邈而
鳳去恐吾道之難行從海東而客來虛上座於函
文歌三章而鹿鳴誦一符而麟經如河決於講磨
願承教於筵前褰青衫而起敬子一人於淵源鯤

岑屹以道脉鰈海濶以真派洪鍾響於木鐸何以
名夫先生稱賢士而豈可謂真儒而猶少生民來
而未有二字煌於尊號肩猶比於冉閔頭豈讓於
曾顏東藩稱以小華夙余知其文獻邦雖小於一
區聖復作於萬古忠如文而節蘇皇帝亦曰嘉乃
周公後而禮樂一魯廣於天下朝宗歸於錦溪學
源深於汶波儀遺箴於鹿洞眷舊講於鵝湖波洋
洋於左海得真源於洙泗環青山而九曲頌黃河
而一清傳道統於魯公又寄語於東邦

以下

唐浦勝戰圖題名

嘉義大夫兼忠清慶尚全羅三道統制使行慶尚右

道水軍節度使 李慶濬源西 韓山人居 京

嘉善大夫慶尚虞侯 申汝梁重甲 高靈人 興陽

折衝將軍忠清虞侯 宋安廷正中 洪州人 京

蛇渡津水軍節度使 禹壽仁丁 禮安人 巨濟

彌助項鎮僉節制使 李暹太丙 全義人 京

折衝將軍 申琢子辛 平山人 京

折衝將軍 李奇男大癸 光山人 順天

禦侮將軍 宋德駟致丙 南陽人 興陽

禦侮將軍 林英立士丙 鎮川人 鎮川

禦侮將軍 孟友曾孝丙 新昌人 蔚山

保功將軍 趙滄浩壬 平壤人 京

振威將軍 李希參而丙 全義人 京

振威將軍 杜起文詩辛 萬頃人 萬頃

昭威將軍 尹琦汝辛 海南人 海南

定略將軍 李命吉天巳 泰安人 安山

定略將軍 魯鴻汝辛 咸平人 長興

顯信校尉 盧毅男士甲 交河人 水原

敦勇校尉 鄭昕景戊 雞林人 京

進勇校尉 魯認公丙 咸平人 羅州

秉節校尉

李希春

景純壬戌

報恩人

海南

禦侮將軍

金一介

汝臣壬戌

金海人

蔚山

禦侮將軍

朴翁

茂仲丁巳

京

京

定略將軍

金大寬

彥弘丙寅

慶州人

新寧

秉節校尉

李自澄

澄之甲寅

廣州人

京

昭威將軍

朴璿

全州人

康津

秉節校尉

李光春

康津

通訓大夫甕津縣令

尹興龍

仲遇丁未

坡平人

大興

承訓郎前長城縣監

孫應虎


景文庚申

密陽人

康津

萬曆甲辰六月日

商洋館圖




御賜勝戰圖

甲辰六月日

第...圖

騰捷之圖




圖本篆大幅潤難移卷中故小其形樣依本模附

被俘同苦錄

魯認	羅州人	奇孝順	興陽驛卒
白受繪	梁山人	徐國伊	務安鄉吏
朴汝楫	咸陽人	鄭東之	密陽正兵
姜士俊	晉州人	風石伊	京畿私奴
鄭昌世	晉州人		
河大仁	晉州人		
金興達	清風人		
金興邁	清風人		
全時習	泰安人		

李曄	全羅虞侯	姜天樞	河東人	徐景春	務安人	金禹鼎	東萊人	姜漈	靈光人	姜沆	靈光人	姜渙	靈光人	姜澹	靈光人
----	------	-----	-----	-----	-----	-----	-----	----	-----	----	-----	----	-----	----	-----

錦溪集卷之五



白雲集



先生幽倭三年圖復讐討著者羊錄而摸是圖

錦溪集卷之六

倭俗錄

在上世有葺不合尊者號為天神以一劍一璽一鏡
 降於日向州仍都後遷都太和又遷于長門之豐浦
 又移都山城州今之倭京也自開闢以來一姓相傳
 云公請於希安得見其國史編年及所謂吾妻鏡者
 則四百年前所謂倭天皇者猶不失其威福自前世
 擇大臣一人摠攝國政然猶奉行其天皇之命而已
 自關東將軍源賴朝以來政委關伯祭則天皇及賊
 魁之代信長而倒懸極焉天皇畿縣之土盡為賊魁

所占奪分裂土地已授其諸將諸州多置代官之士
使諸將之食其土者兼察代官之土收其土毛貿販
銀錢輸致王京以爲國用代官三萬石則食土者自
食一萬石故倭將之多受代官土者例多饒富食土
者在前世則猶恥盡取於民留其半以與農民不甚
貧瘠將倭不甚豐足及賊魁之代信長而箕斂極焉
糞田取盈蒿結不屬於民故將倭富擬秀吉農民貧
無擔石其所謂攝政者在前世則必以藤橘原平四
大姓爲之貴以襲貴賤以襲賤故當權之倭猶或重
惜名義不敢恣爲不道及信長爲其下明知所殺秀

吉自奴隸崛起攻殺諸大臣自稱關伯請受四大姓
於其國王在王所者皆曰稱伯餘事惟公姓不可許
賊魁愠退自稱平氏其後又改爲豐今之當路者皆
庸奴市兒之託秀吉卒富貴者也倭僧之稍有識者
皆曰自有日本以來未有如此時之顛倒者也

秦始皇時徐福載童男童女八海至倭紀伊州熊野
山止焉熊野山尚有徐福祠其子孫今爲秦氏世稱
徐福之後今爲倭皇則非也 洪武中倭僧津絕海
八貢中原

太祖命賦詩詩曰熊野山前徐福祠滿山藥草兩餘

肥至今海上波濤穩直待好風須早歸

太祖賜和章曰熊野峯高血食祠松根琥珀亦應肥
昔時徐福浮舟去直至于今猶未歸

日本之國其道八其州六十六壹歧對馬則不與焉
其島二其鄉九萬二千其村十萬九千八百五十六
其田八十九萬九千一百六十町其畠十一萬二千
一百四十八町佛宇二千九百五十八神宮二萬七
千六百一十三男丁十九億九萬四千八百二十八
名女數二十九億四千八百二十口其公葦羸縮代
各不同而大略則可以推見也又曰日本極東則陸

奧極西則肥前自陸奧至肥前四百十五里極南則
紀伊極北則若狹自南紀伊至北若狹八百八里自
陸奧平和泉至夷海上三十里坂東路一百八十里
也嘗謂倭國之大不及我國及見倭僧意安者倭京
人也自其祖與父北學於中國至意安初解計學天
文地理嘗作土圭以測日影略知天地之圓方山川
之遠近嘗曰壬辰之役倭人悉取朝鮮戶曹田籍來
半不及日本云且以關東及陸奧州道里推之則比
我國極遠矣

畿內五國

金城集卷之六
三
山城州上管八郡行程南北百有餘里朕跡多有藥
方種生百倍味甘大上上國也賊魁居焉稱皇帝
太和州建十五郡南北二百餘里大山繞之種生十
倍禾稻甚精米極白門正者守之歲捧米三十三萬
石與駿河守分食

河內州建十五郡四方二日餘程布廬許多土厚而
穀出五倍秀吉之諸將守之歲捧

和泉州下管三郡南北百餘里負山抱海土地冷寒
五穀無味魚鼈最多木工匠捧貢

攝津州建十三郡周迴二日半程南暖北寒五穀先

登魚益繁盛關伯守之

東海道十五國

伊賀州建四郡四方一日程東南海而北有山松竹
茂盛土氣暖豐筒井氏守之有順慶者極勇秀吉毒
殺其子大藏自為守

伊勢州十六郡南北二日程山海平均土厚而種一
得百又產白金京極食之有大明神宮土人事之如
事父母

志摩州二郡一府四方半日程海藻最多大偶守父
子食之

尾張州九郡一府一島南北三日程土厚地肥種生千倍福島大夫食之

三阿州八郡一府東西一日半程山海多而地氣常寒五穀不熟生田三左衛及田中兵部食之

遠江州十三郡耕地七尺種出千倍又萬倍掘尾帶脅食之

駿河州上管七郡一府東西二日半程原野山海平均土食最多又有富士山山形如覆甑高可接天頂有大穴其深無底暖氣自下直上有同雲霧六月尚有白雪 皇明宋太史景濂有詩曰萬朵蓮花富士

山蟠根壓地三州間六月雪花飄素窰何處深林求

白鷗者是也倭僧嘗傳熟田熊野富士謂之三神山遊觀者必齊一旬後乃無灾殃中村式部小輔食之

伊豆州三郡一島東西一日餘程島

我國多田少山

高海藏魚鹽類多中納江戶食之

相模九郡四方三日程地厚土肥山淺而無材木海藻魚鹽多內府家康食之鑄名劔倭中之名府

武藏州二十一郡一府周回五日半程野廣無山田畠豐足野菜多家康食之

安房州四郡一府南北一日半程田野平均魚貝最

多里見氏食之

上總州十一郡一府南北三日程海岸弘廣絹布最
多家康食之

下總州十一郡一府一島南北三日程山海具多禽
獸交充然無食味家康食之

甲斐州四郡一府南北二日程四方極寒無陽氣五
穀不熟牛馬最夥左京太守食之

常陸州十一郡周迴四日程田野頗廣市衢亦多牛
馬盛綿饒蚕多佐竹食之

東山道八國

近江州大管十三郡周回二日半程山川田畠保疆
厚潤種得千倍隣京春風早日本四番國也京極侍
從及石田治府小輔及長東大藏頭分食之

美濃州上管十八郡一府南北三日程山原田圃多
五穀種生萬倍綿亦豐歧阜中納言諸小將食之土
產上品紙

飛彈州下管四郡南北二日程山深材木多貢柴薪
多益五穀不熟國之下下國也金森法印僧食之土
產黃金魚多

信濃州建十郡周回五日程陽氣不照草木不長海

阻無魚鹽鑿池一丈桑麻盛綿帛多土產名馬貢麻
帛馬真田氏食之

上野州建十四郡東西四日程暖氣足桑多絹帛豐
而斂致貢修理太守食之

下野州建九郡東西三日半程山小而野濶土厚草
木多種出百倍

陸奧州四十九郡六十日程土田極膏百物具備海
中金山倭奴通行則必三日齊戒可濟地接蝦蟇廣
漠無際盡倭國不及一州之長廣其道通處爲五十
四郡山戎自成聚落無有號令節制者也地方又過

五十四郡居人長大而身有毛倭人稱之我國地云
其地多文魚貂皮倭言自奧直渡朝鮮東北道里絕
近而北海風高疑不敢渡云最近關東嶺南左道政
宗景勝松澗食之

出羽州上管十三郡東西五十日程暖氣早五穀先
熟秋田藤大郎食之

北陸道七國

其地甚寒
雪深數尺

若狹州建三郡南北一日半程海近有濕氣魚物多
利鐵多貢漆勝俊小輔食之

秀吉本
婦

加賀州中管四郡南北二日半程筑前四郎食之

越前州建十二郡南北三日半程山在南海在北冷氣不絕穀不熟桑麻盛

越中州上管四郡四方三日程鹽藻魚鼈多又五穀器械多貢漆孫四郎食之

越後州七郡四方六日程山當南海環北五穀不熟桑麻多掘里氏久大郎食之土生細布常於雪中練曬

能登州建四郡東西二日半程地有冷氣五穀晚實利鐵多鎔大器桑多衣豐肥前守食之

佐渡州建三郡四方三日半程草木茂五穀繁魚鼈

多牛馬不知貴景勝食之

山陰道八國

丹波州上管六郡四方二日程王城附庸之國五穀柴薪全備玄以父子食之土產綿紬甚堅

丹後州五郡南北一日半程魚鼈桑麻足長崗食之但馬州八郡東西二日程土厚粟稗多柴木饒土產白金豐後守食之因播州上管七郡南北二日程海多山深海藻絹布多右衛大夫食之伯耆州建六郡南北二日半程山深土厚五穀布帛多輝元食之出雲州建五郡東西二日半程樹木瓜菘相交土產

鐵農器絹布多輝元食之

石見州建六郡南北二日程五穀乏藻蜜多以鮑稱名小下國也輝元食之最近我國關東嶺東等處

山陽道八國

播摩十四郡四方二日半程土暖不見雹霧絹布紙帛多衣食足賊魁諸小將分食之

美作州七郡東西三日餘程四境圍塞無風草木衣食繁多與我國無異輝元秀家分食之

備前州十一郡四方三日餘程帶南方暖氣故草木五穀先秋致貢早利刀銳戟多帛秀家食之

備中州十一郡東西三日半程利刀耘梨多五穀藻布多而日飽美食秀家輝元分食之

備後州十四郡東西二日餘程陽氣發於春盛於夏秋冬極寒五穀早熟酒醢久賊魁養女婿秀元食之安藝州八郡南北二日半程山深海近魚鹽足五穀無發秀之理輝元食之

周防州六郡東西三日程穀種出十倍蜂蜜鱗甲類多關市處處有之輝元食之

長門州六郡東西二日半程山南海北魚鼈類多稷穀倍他國輝元食之

南海道六國

紀伊州七郡南北四日半程魚鱉鹽菜饒一名國母
州倭習言倭始祖出降比土稱國母三方海欠平地
五穀不熟賊魁之諸小將食之

淡路州四郡四方一日程衣鹽魚不乏良村又多脅
坂中勢食之

阿波州九郡四方二日程土厚而山多稷稻豐稔魚
鮮禽獸類多家政食之

讚岐州十一郡東西三日程山川田畠平均百穀豐
魚菜盛名人多出是地大中國也一正食之

伊豫州十四郡四方二日程原野田畑火粟多桑麻

鹽菜豐左馬助食之

土佐州七郡東西二日程土厚五穀純熟良材多盛
親食之野馬州漏未詳

西海道九國

筑前州二十郡南北四日程米粟珍寶器械具備秀
成食之

筑後州十郡南北五日程穀與魚鱉不可勝食珍寶
器械亦多金吾食之

豐前州上管八郡南北四日程近唐為隣藥種器充

以金帛致貢壹歧守食之

豐後州上管八郡四方三日程桑麻多布帛五穀與唐無異源介等主之

肥前州上管十二郡南北五日程土地膏腴種生百倍桑柘農利厚魚鳥備食與南蠻唐琉球呂宋等國爲鄰商軸往來不絕我國人往來接待如事土主左根者食之雖一隅地小而兵強云

肥後州大管十四郡四方五日程材木柴穀魚鼈紙綿與我國無異行長分食之

日向州五郡四方三日程桑麻五穀平均無飢寒兵庫最多義弘主之

大隅州八郡東西二日程雖小國食祿豐多魚鼈紙帛最饒百物具備義弘食之

薩摩州十四郡四方二日程出水高城雖小國隣唐故備器用之雖然無桑麻薩摩日置伊佐阿多河邊欸娃指宿結汝雞山與小鹿兒甌島唐人有無相通市衢太平交行唐蠻船無日不往來衣服言語小有唐制義弘主之

對馬州下管二郡四方一日程離日本之地故又號爲島有異珍之寶勸清神隨唐是故被置探題職小

金澤集卷之六
下國也義智食之○東距壹歧島以待盡日西風終日東風往來此島東西長南北短土地礫确水田無一畝菜蔬之理只牟麥種於沙石之上則長不滿數寸秀有三四實王亂前只通我國之關市以爲資生其所產魚角胡椒等物自南蠻出來又獺皮狐皮等物在倭國無用故此奴賤買虜中而貴賣我國若金銀罽布綾段則其所重故不得賣我國對馬島爲一邦故其子女所着衣服似我衣裳男子幾解我言指倭國爲日本稱我東朝鮮爲一國蒙利於吾東者多對馬諸人戴我國之恩附於我國秀吉並吞六十六

州取于此邦丁酉以後不通關市之道恆定月朔使無無時往來之弊來貢之船豫定數隻使無連船往來之弊日本出來之物隨上中下結定物價釜山僉使守護一切防按

天王卽倭皇帝也不剪髮不下堂望前素食望後鮮食在前世威福已出置攝政關伯大納言等以攝君事中歲以來攝政等擅命所謂天王者號令不出王城置奉行一人看護王城內外秀吉之世則德善院玄以者爲王京奉行者典守之稱號也○平信長統一時帶其官爵者任其職事秀吉時土地分割給官

錦溪集卷之六
者雖有官名不治其職以上官及任州者皆稱將倭
將倭部曲謂之家臣

錦溪集卷之六

錦溪集卷之七

附錄

請建祠上言

六代孫繼運

右謹啓臣矣段臣矣身六代祖故府使臣魯認在
宣祖廟朝經術文學忠孝節義實不下於當時勳德
諸臣而獨臣矣身先祖故府使臣認生而不得蒙
褒揚歿而竟未有彰顯則臣矣身先祖臣精靈亦
必有煩冤者矣臣矣身敢綴先祖臣認事蹟梗槩
謹昧死以聞先祖臣認早從事斯文當壬辰倭亂
時年二十七官則別提也與光州牧使臣權慄倡

義討賊籌畫方略累致戰功轉鬪至于嶺南宜寧
縣時 天將楊元方陣南原爲倭所圍勢甚急
矣身先祖臣認以權慄令往覘南原賊楊攻戰三
日兵破城陷則突出直上京師倭兵一網四面
矣身先祖臣認以隻身用武無地獨戰數日援絕
力乏爲倭所擒牢囚醜地十餘日 矣身先祖
奮罵倭曰汝何不殺我賊曰關伯之令朝鮮人年
壯者及官者生致以故囚公不殺 矣身先祖
認自念背 君離親陷身至此欲死無地抗節守
義辭氣慷慨倭奴亦不能屈以飯一盂魚一尾朝

夕饋之 矣身先祖臣認不知 君親何如遂却
魚而對飯落淚曰食讎之食寧不自愧悲歎再三
倭僧希安者北學中國頗有經術憐 矣身先祖
臣認忠節愛其文學日從親密 矣身先祖臣認
潛懷沼吳之策外若許而內探賊情願見日本風
土記因得暗記海道險夷兵民強弱田畝結卜及
官總地圖路程里數勇者謀人亦皆詳記耳聞目
覩無不細錄日夜腐心誓天泣血扣地圖報所以
逃還復讎雪恥未得其路時 大明差官林震號
適到倭地往見林曰朝鮮幸被 天朝洪恩掃蕩

金溪集卷之七
二
賊寇故敢來謝林曰君羈倭歷年能探倭情否答
示日記曰秀吉積惡暴死餘賊憤恥其圯更欲犯
朝鮮仍有射天計我國不可不豫備吾欲早歸國
以備沼吳報讎之策願與公同舟渡海所探倭情
上達天朝俘民在日本者盡數刷還後以圖他
日雪恥之策云則林聞而壯之遂與載歸華人盛
餽水陸珍味則玄然而辭曰吾不知君親安否
雖在顛沛何忍食旨毀禮於一時乎華人曰君猶
未知處變有身而後可盡忠孝萬死之餘何執禮
之過林在傍遽曰此人雖在賊土猶素食執禮蠶

倭歎服况既渡海不變其志不須強辯華人咸曰
朝鮮素稱文獻果非虛語別命蔬果以進卽製白
衣白冠以給臣矣身先祖臣認之所過華之文人
學士輒來見曰聞足下抗義不屈完璧脫身志在
叫天復讎孤忠壯節雖古之包胥蘇武檀道濟
華袁文山豈加於足下哉令人欽慕咸皆命韻相
和都御史贈臣矣身先祖臣認詩曰孤臣九死干
戈地不似當年李少卿監察御史詩曰君父深
讎不戴天全身歸去豈徒然知府官詩曰還相舊
君如范蠡十年生聚剪夫差訓導詩曰張良引去

韓讎重蘇武生還虜氣摧都訓導詩曰還對舊都
應頌德好將忠悃答吾君臣矣身先祖臣呈文
大司馬則大司馬歎曰萬死餘生志切雪復可謂
忠孝之子呈文左右布政則布政曰子之冤慘既
已領了凡有仁心者孰不矜憐呈表御史則御史
覽閱曰忠君孝親之誠於此領了且分付曰尚今
素食莫非固執願須從權保身生還則於忠於孝
其盡何如臣矣身先祖臣認泣示日記曰本國禮
法雖在流離豈可暫毀諸相歎曰執禮守節如此
誰謂朝鮮藩夷耶左右布政贈閩中問答八卷銀十

兩右布政嘉賞儀範文學命參兩賢祠講會諸學

士揖臣矣身先祖臣認於上位曰側聞足下抗義

守節執禮高風願一見之今幸合席不亦樂乎臣

矣身先祖臣認講論止修之學則咸曰足下聞一

知十吾儕未能或之先也云因日與講討程朱之

學則舉皆稱歎曰足下可謂海東夫子及護送北

京各衙諸相院中同伴作序贈詩餞別十里

神宗皇帝遣還詔曰魯認之命貴得緊貴得緊忠如

文山節同蘇武特命兵部別賜健馬一匹差

官護送行人司行人李汝圭到鴨綠江員外郎史

汝梅至義州進士倪士和謝兆申餞山海關臣矣
身先祖臣直達 朝廷人皆驚異而

宣祖大王聞之親自引見堂上 啓下備局遠近瞻
聆 啓曰別提魯認自日本至中華而生還得全
素節皎然本心 天監所燭乘驛而歸臣矣身先
祖臣認馳到于家父母已歿遂作廬墓側追服三
年朝夕拜哭不以風雨寒暑小廢朔望祥禫一如
初喪其後臣矣身先祖臣認誓心沼吳每陳奇策
宣祖大王極加歎稱 特賜勸武科歷拜沿海之職
以試方略戎情到輒超異

宣朝大王下教褒獎擢拜水原甕津兩節鎮之任時
鄭仁弘用事見臣矣身先祖臣健馬欲奪之臣矣
身先祖臣認曰此馬乃

皇帝所賜非可許人也仁弘大怒數為枳塞不遂滅
倭之志湮歿于家當時縉紳名賢作文贊美之若
故文忠公臣李廷龜集曰湖南士人魯認漂到蘇
杭州叅判臣趙希逸辭曰繫太牢之前陳非鷄鶩
之攸享故 贈承旨臣姜沆文曰南越王頭必懸
漢北闕下西平公業再出吾東方人伏以臣矣身
先祖臣認捐私循國倡義討賊其忠大矣見俘賊

窟抗節不屈其心壯矣食素冠白終始靡渝其孝
 至矣志切沼吳屢陳奇策其誠偉矣高忠壯節島
 夷既服純孝文學中華感動則 國家所以褒揚
 之 典宜莫先於臣矣身先祖臣認不幸湮沒未
 蒙殊 恩寧不冤甚故 贈承旨臣姜沆與臣矣
 身先祖臣認同時被俘於倭者而姜沆及返本
 國之後搢紳咸推海東蘇武故 朝家特 贈顯
 職至享俎豆臣矣身先祖臣認忠孝節義實不下
 姜沆而獨未蒙褒顯之 恩臣矣身繼運敢懷私
 冤匍匐呼訴於 法駕之前為白去乎伏乞

聖慈天地父母特命有司使臣矣身先祖臣認一依
 姜沆例同被 褒顯之典使臣矣身先祖臣認經
 術文學忠孝節義不至終泯千萬伏祝
 批曰魯認之忠節非不偉矣而受 別恩於
 宣廟特賜勸武科任閫之職又極壯矣豈謂湮沒
 褒享之典不可以其子孫之上言輕施置之從公
 如何

館學通文

右文為回諭事觀此 盛諭錦溪魯先生貞忠大
 節既被 皇明之盛褒又蒙我 朝之優獎名耀

華史事光本 朝武夷講學之道誠與崔孤雲上
下而日本刷俘之節實與姜睡隱伯仲則其在崇
節慕義之道合有建院殿享之舉而尚今未遑實
爲欠典先生之本孫繼運裏足叫 闡將有 褒
揚之境而自春曹且有 筵席之稟則 貴道之
發議設院允叶公議亟舉盛儀經始建院俾爲永
世矜式之地幸甚右敬通于全羅道內儒林

正廟朝戊申四月日太學掌議

李權

全羅道疏會發文

右文爲通諭事 鄉先生祭於鄉禮也況且貞忠

大節炳如星斗則叫 閭而褒之立祠而享之者
豈非士林之美事乎竊伏惟 貴州錦溪魯先生
諱認道德忠節旣被 皇朝之盛廢又蒙我 朝
之優獎名耀華史事光本 朝武夷講學之道誠
與崔孤雲上下而日本刷俘之節實惟姜睡隱伯
仲則非徒一鄉之大賢而卽一道之大賢也非徒
一道之大賢而卽一國之大賢也非徒一國之大
賢而卽中國所知之大賢也然而使闕苾芬之祀
禮者顧非 盛代之欠典乎側聞先生之本孫繼
運裏足叫 闡將有褒揚之境而自春曹且有

筵席之稟自本家經始建院之議則凡在我同道尚忠之道亦豈無顧助之義乎伏願僉君子拔例優扶一邊贊揚其忠烈一邊完訖其祠宇以爲奉享永世矜式之地千萬幸甚右敬通于羅州鄉校

全羅道羅州幼學吳時學等謹齊沐上書于

大宗伯閣下伏以崇道獎節 朝家之令典尊賢建祠羅邑之古例也惟茲錦溪魯先生諱認之道學節義炳朗日月昭揭宇宙而爲李月沙李芝峯李體素李漢陰姜睡隱諸賢之所推許則百世之下士林之勇感欽仰爲如何哉 等請敘其梗槩試

垂察焉蓋先生當壬辰島夷之亂率家僮百餘名赴權元帥幕爲募義使倡義討賊奮不顧身拒守梨峙鏖戰幸州前後斬獲至數千餘級癸巳晉州之陷又與權元帥轉戰宜寧連勝奏捷及至丁酉聞 天將楊元被圍於南原先生請於權元帥馳往覘視則城已陷矣欲歸報元帥道遇賊陣奮擊斬刈數百餘酋矢窮力盡爲賊所俘俘八日本抗節罵賊終不屈焉雖在顛沛之中未知 君親之如何自處罪人白衣素食潛懷脫虎口之計每念雪 國恥之志盡其倭國山川錄其賊情虛實謀

還故國適有天朝間諜使奉命至倭國遂與
載歸至中國八拜朱晦菴祠書院院長及諸學士
皆稱歎曰魯先生海東夫子也已友先生上催歸
原情疏而備陳倭國之風土賊情軍丁田結及山
海險夷民戶虛實

神宗皇帝詔曰忠如文山節同蘇武苦渡鯨波泣叫
天闡其命貴得緊貴得緊因賜天廐撻馬生還
本國惟我

宣祖大王引見下教曰爾自日本至中華生還本國
宋之天祥漢之中郎皎然本心天監所燭古有

社稷臣今爾近之特除水原府使後拜黃海甕
津節度使嗚呼先生之道德見於中華史冊昭載
於本朝國乘千載之下凡有志氣者孰不欽慕
而景仰也哉茲以崇賢建祠之議齊起於京鄉而
太學通章列邑發文次第並到矧立祠宇于本州
居平之地卽先生杖屨之所也大抵此祠非徒一
鄉之賢祠而卽一道之賢祠也非徒一道之賢祠
而卽一國之賢祠也非徒一國之賢祠而卽中朝
所共知之大賢祠也然則此祠之與他賢祠自異
者若是其較著而建立有年規模未成祭物及院

保不能成樣故呈于本官則題音內祭物及院保
非禮曹知委公文則本官不可擅便云故生等不
遠千里聯名齊籲於 掌禮之下伏乞 特陳慕
賢尚節之義 另念魯先生之道德忠節祭物及
院保凡節特為定給之意題下而發關另飭俾此
大賢祠無至春秋闕享之地千萬幸甚
題音魯錦溪安靈之所遠近瞻聆孰不欽慕而祠
院儀節自有 朝家之定制依他未 賜額例施
行之意往呈于該邑向事

正廟己未二月 日

禮成祭文

天挺賢豪東國之紀允文允武展也君子頑廉懦
立龍騰鳳翥忠孝德行爲世所與早事斯文聞道
羅公以蔭補官不得大揚歲值龍蛇時年升七往
見權帥式務乃察搏戰畿北倭奴大挫累度奏捷
期於圖閣乘時破賊不幸見俘幽囚迫脅備經崎
嶇蘇羝文樓一心靡渝白冠素食 君親長號於
忠於孝斯其至矣吾無間然卓卓如彼及至武夷
祇謁程朱華士敬服許以真儒又拜 皇廷 神
考稱賞 賜馬歸國 恩遇廣蕩 宣廟敬欽大

加褒寵授之都護許以神勇包胥慟哭天惟矜恤
睡隱生還人多齟齬奸臣枳塞末路險巇撫念往
跡可勝涕洟黃壤之間積冤難平百世之下公議
乃行殘裔叫 閣章甫齊聲爰立賢祠于錦之西
溪山如古桑梓依迷杖屨遺痕完如平日神道豈
遠人情攸悅黍稷馨香罇罍淨潔自今享之其永
無斃尚冀昭格啓祐來學

咸豐李
宏宅製

祝文

武烈先生位

祈常殊績丕闡家邦永世斯彰有光于宗

羅州林
海鎮製

錦溪先生位

文學忠節華士欽仰公議不泯爰成廟享茲值中
丁精禋是宜粢盛庶品式陳明薦尚

饗

咸豐李
宏宅製

湖南節義錄

魯認字公識號錦溪咸平人 贈判書希周後
贈叅議師曾子天性至孝才氣卓越少從羅叅奉
恆受業天人性命之理道學淵源之正皆研究周
通羅公大奇之年十七中 萬曆壬午司馬二十
薦 除別提壬辰受親命率家僮從權元帥慄以

金溪集卷之十一
募義使贊畫方略把守梨峙鏖戰幸州前後斬獲
至數千餘級癸巳晉州之陷又從權公追賊宜寧
連勝奏捷丁西南原之陷以匹馬單戈來覘賊勢
城已陷 天將亦走道遇賊兵奮擊斬級會大霧
四塞賊圍三匝公中矢墜馬幾絕復甦賊束縛拘
囚俘八日本公終始抗節求死不得翌年正月望
與本國務安士人徐景春及同俘數十輩潛乘小
艇夜出江口讚岐守部曲四郎者覺而追捕束縛
拘原露刃劫降公小不變色抗聲大罵曰速殺我
速殺我我何求活於無 君親醜域乎倭奴知不

得屈援劍而止有僧希安者感其忠節具飯蔬魚
饌朝夕饋之公不知 君親安否自處罪人不食
魚肉白衣素食對盤落淚希安感歎曰朝鮮守法
之人日從親密公願見日本風土記僧出示西堂
所藏畫公模其山川險夷錄其賊情虛實謀還故
國適有 天朝差官林震號奉 命至倭公往見
訢懷差官感公忠節遂與載歸至閩中盛餽珍饌
公以未聞 君親安否又辭不食言淚俱下中朝
士大夫環視贊歎曰朝鮮禮義之稱果非誣矣別
饋蔬果製給白衣冠比之申包胥蘇武因入于武

夷書院院長及諸生虛上座揖讓講討程朱之學
及綱目春秋禮經詩書百家語公無不講解融貫
諸學士皆稱服曰魯先生海東夫子留幾累月院
中諸賢各爲歌詩以送名其帖曰

皇明遺韻徐布政匡嶽贈以白金十兩 明宗錄八

卷此乃心性制策孔孟道統傳授之書也餘諸篇

重複故止此

先生事實播在海東誌及三綱錄芝
峯集僑寓散錄而率多複出不須登

刊

錦溪集卷之七

名家有集例也或以道德文章或以忠孝節義而惟
我錦溪公蔬食異域醜虜猶知誠孝講學考亭華士
咸服經理獲達 皇朝神考嘉以祥忠武節及還本
朝 宣廟稱以古社稷臣則向所謂道德文章忠孝
節義兼備於公之一身也公之平生蓋是山岳正氣
名著華夷事光邦國而竟扼於仁弘得未展所抱則
後孫之悲憤爲如何哉有周還錄遺稿及閩中諸賢
贈別詩文而迄未登刊藏閉百年則洪鍾無聞雲錦
秘章列邑諸孫不勝於悒而謀所以印布者久矣今
仍修講繼確此議乃以本藁就正於博雅僉君子而

更與族叔宗淵氏族弟致赫甫於其斷簡謹斯蒐輯彙爲上下卷則是雖片鱗隻羽可見龍鳳之全美矣大羹玄酒何必盡飲而知其味也模印于本院講堂而告訖之日尤不覺感古而愴今也已

後孫秦臣拜手謹跋

維岳降靈天意有在惟我鼻祖自從箕聖東來之後以清節世爲傳授之家法事在久遠不可盡述而至若錦溪先祖挽近挺出其貞忠大節荐蒙天褒又有華東諸賢之所贊揚則爲其後孫何敢贅說於其間哉同時有副正公亦特挺天姿也唐浦之勝戰

深河之立節有足聳感於百世而與錦溪公同門同代又是同功則是固天意有在自岳篤降者也惜乎門極寒微世無知者尚稽芬苾之盛禮只有蟬蠹之片簡歲月愈久幾乎漫壞則諸宗所慨烏可已也茲因先集姑附梗槩

後孫致赫拜手謹跋

嗚呼我魯家風有自來矣在昔江華鼻祖以有商舊臣從箕聖東渡義不讓夷齊之西山矣逮夫中郎將公入則皇唐之間帥歸則新羅之學士望亦重文武之吉甫矣自麗中葉侍中公以後率多才全文武

名震華東或承紫魚袋或受青冥鉞及我 國初蓮
汀武烈公早定復城之策晚遂遯世之志咸平之月
岳卽子陵之桐江也伊後二百年有副正公與錦溪
公並生搶攘之世共扶春秋之義錦溪公之如蘇文
已悉於 萬曆皇詔及華東名賢之贊揚副正公之
爲巡遠只有數君子之著述斷簡殘編難期壽後寒
門殘裔敢望光前坡嶺深河只見雲水之白而已茲
附先集之下以俟百世之公議

崇禎四癸未仲冬下澣後孫宗淵拜手謹跋

錦溪集卷之八

附錄

書魯副正唐浦勝戰圖後

此圖藏在於其宗裔蠹篋而爲子孫者亦未曾記
認近於壬午年間始得搜出故公之行狀未及八
錄考之祀宋旣如此况可望垂之竹帛也哉甲辰
之後經過幾甲辰耶兵燹之殘蟬蠹之剩而一幅
丹青宛如昨日旗旒飄拂劍箭相雜龍雀四圍虜
艦孤窮千斤鳥卵勝鼓殷天摩挲以手不覺瞑目
當時畫圖以傳夫豈偶然獨惜乎龍蛇之亂將軍

不得登壇帶鉞而只以僻鎮編將僅錄於鐵券之末勳當日雲中舊守寂寥無聞而畢竟坡嶺一死豈天將以完節付之將軍而世所謂勳爵不足多也耶噫伯珪以一盃濁醪劔歌於紙窓之下而空望唐浦雲水後千百載何可盡英雄之淚也
崇禎後三癸未長興魏伯珪謹跋

副正魯公墓表陰記

春秋之義莫大於尊周亦天理中一事今於君臣之義能盡性分之所當爲則自可合於天理雖不讀一部春秋而尊周之義固自在矣嗚呼故副

正魯公諱鴻非所謂其人者耶昔我

神宗皇帝萬曆四十六年戊午建虜大寇 帝下詔徵兵 本朝金將軍應河以宣川郡守領左營兵將赴時公棄官居天冠山下曾爲金將軍所知至是檄召之公與同鄉壯士卞德駟卽日辦行裝將發有一子尚幼攀衣啼號公抱而置之曰汝其好長也慷慨語家人曰大丈夫今有比塞外之行幸得死所萬里遼薊裹革是分兒子輩無作別離狀妻孥莫敢仰視立飲酒三大椀遂上馬不顧而行比至從金將軍隸副元帥己未二月二十一日渡

金溪集卷之八
江入遼及深河之戰公與德駟左右金將軍不離
次所射殺甚衆俄而矢盡劍亦折將軍曰公等皆
去公曰豈有獨生之理乎遂與之同死實三月四
日也有一卒伏於亂屍中潛見其始終生還 本
國爲語湖南人曰深河大樹下積屍中長身大面
髯半白者卽魯將軍屍也嗚呼偉哉公之死也華
陽宋先生書金將軍廟碑曰將軍之一死可以明
天下之大義立天下之大經爲春秋尊周攘夷之
義也深河大樹真公之死所終能與金將軍爲春
秋尊周之人則正所謂盡 君臣性分之理不讀

春秋書而自合尊周之義者也公豈不偉且奇哉
公字汝信咸豐人始祖諱穆麗朝封咸豐君其後
有賜紫金魚袋仁厚修文殿學士貫道累世冠冕
我朝有得平以文章名歷踐翰林舍人公考諱平
國官軍資監正公以 嘉靖辛酉生身長八尺餘
體大過圍廣額方頤面如斗髭鬚若神怒則磔磔
如戟勇力絕倫韜略精熟見者皆以魯將軍稱當
壬辰倭寇以武蔭末班選壯士與兵使黃進水使
魏大器等皆力戰斬獲輒居最都元帥以公習知
海路形便 啓請鎮南桃浦公卽整理船具急赴

李忠武期會適潮退船膠衆不得曳下公遂負船
推之船疾如矢賊船已漲海公且戰且行李公見
而壯之極稱獎焉及夫五月二日露梁之戰公爲
先鋒大捷後錄原從二等勳敘功增秩至訓練副
正始登庚子武科公性亢直老而益硬與世寡合
公亦無進取意晚爲臨淄鎮僉使則歎曰折腰向
鄉里小兒吾亦恥之遂謝病歸冠山舊居時或射
獵山澤間每以霸陵亭李將軍自況後以遺衣依矢
復禮葬于長興拂簣山東坐坎之原淑人魏氏祔
焉淑人父德弘祖進士鯤淑人享年九十餘說當

時事歷歷子孫嘗錄以爲家乘子一變一變三子
時聖禧聖師聖二女爲金汝漢張雲翼妻弼周弼
宗時聖出弼昌弼宣弼武禧聖出弼審師聖出皆
好義氣善騎射不墜公偉丈夫風公之忠義貫金
石儀度出倫類天固有意生者公終守志死事義
光尊周公可謂不負天所生之意也然生而君
上不知其何狀歿而忠節不見其褒錄何天之生
之者厚而報施者薄也抑天下勢而已豈天定亦
不能勝人而然耶傳所謂大地之大而猶有所憾
者非耶弼審子天政從於溪上一日以公狀示余

請余公墓文余感慨而書之如此俾刻于石陰時
崇禎甲申後再庚辰清明日坡平尹鳳九書

魯友天政之謁文于丈席也先師欽歎副正公
節義卽爲文以授之手造冊子其衣紙摺整紙
繩穿束皆自爲也因自題其面於今奉玩可爲
臥龍之片鱗凡爲魯氏後者雖此文八石之後
幸勿漫壞此冊念先師勤摯之恩也

己亥二月肫魏伯珪識

副正公招魂時輓詩

遠近輓詩
不能盡記

萬古綱常丈夫死深河水碧日星輝遺衣莫向江

頭復魂去朝天定不歸

右進士魏廷望

題副正魯公墓表後

士之立名節死國事雖志氣有所感激其平時所
養必有大過人者乃能遇事而發匪偶然也公身
長八尺餘廣額方面神采燁然世皆以魯將軍稱
當龍蛇之變選壯士赴李忠武陣鼓勇戰艦斬獲
甚多錄二等券及深河之役赴金將軍檄奮不顧
身冒矢石受鋒鏑矢盡力窮與金將軍同日死於
大樹下嗚呼此豈非中有所養臨大節而不可奪

者耶忠義之氣凜凜如秋霜烈日至今百載之下
尚令人髮豎膽聳雖古之巡遠何以加此况世道
衰薄志節頹靡全軀保妻子之徒滔滔皆是而如
公之貞忠大節生而不見知於明主死而不得
蒙褒揚之典其子孫又復寒微零替名堙滅而
不稱悲夫苟有讀公之墓表者彼忘義而偷生者
豈不有愧於心哉

崇禎三戊仲秋昌原黃幹謹書

錦溪集卷之八終

錦溪集開刊跋

余莅綠文館之越二年暮春者有帶方士子魯銓踵
門而請余曰吾之先祖有遺集若干卷而湮沒是懼
謀所以繡梓願得一言而跋之余屢辭不能得遂盟
受之敬讀一過訖先生始卒槩可知矣昔當龍蛇之
歲倭寇充斥鸞輿播遷先生以逸別提倡義討賊
奏捷亦屢矣龍城之圍中矢爲俘口不粧而得不死
者七日處害中而抗不屈者二年幸與天使同舟
潛出中國而八閩中得與我夷諸學士講討晦菴之
學院中士咸稱曰魯先生海東夫子臨別諸賢各爲

詩文名曰 皇明遺韻已亥東歸之日

神皇有忠如祥節如武之 詔賜馬護送先生歷覽

列國舊域殆同子長之遊越明年歸謁

宣廟陳復讎之策破倭奴之餘 上嘉獎忠節賜勝

戰圖 下教曰宋之天祥漢之中郎古有社臣今爾

近之 除水原府使不幸當光海之時爲仁弘之所

詆知國事之不可爲也謝病而歸先生嘗從師於栗

谷李先生而與一代名賢相軒輊若以遺集中詩文

之相與唱酬撰述者觀之先生忠孝節義文學經術

可有以識全鼎者矣是以先生之歿幾二百年有正

考曠世之遇 命建院于羅州而俎豆之猗歟盛哉

神皇聖考之崇褒炳若日月華儒東賢之推詡有如

山斗可以不朽於天壤間矣顧余荒拙之辭何必贅

焉先生咸平人姓魯諱認字公識錦溪其號也見余

請文者卽先生之七世孫也今日之役亦可謂是祖

是孫也已

歲在戊子三月 日淳昌郡守李度憲謹識

